



Digls 1722 e la tgea «Bodenhaus» vagnida transformada da la susta tigl hotel.



An quella tgea istorica cun custevla substànza architectonica tgar'ign blears cantùns idilics.

Quater uras davent da Tusàn – sis davent da Chiavenna

Nov cudeschet: «Splügen – wo sich Wege treffen»

■ (anr/grc) Dad Eberhard Zangger a Regula Sigg e actualmeing cumparieu egn cudeschet da la tgea editura Desertina cun igl tetel: «Splügen – wo sich Wege treffen», cun igl suttetel: «Das Bodenhaus erzählt seine Geschichte». Angela a Willibald Löschl-Burkhardt en a partir digls 2000 possessurs da quella imobiglia istorica da Spleia an furma d'egna sozietad anonima da famiglia. «An quella tgea satgatan blears beals cantùns idilics», raporta l'ustiera digl Hotel Bodenhaus anviers l'anr. Ad igl visitader da que hotel vean cunfirmo da que fatg sch'el varda ad admira. «Quater uras davent da Tusàn – sis uras davent da Chiavenna», vean Spleia dascret an que cudeschet, sacapescha digl tains digls tgeavals.

Cuntegn digl cudeschet

Co salascha declarar ad egn passànt l'istorgia elementara da la Valragn an egna mes'ura? Quella dumonda para ca igls dus auturs vegian satschanto cura c'els àn sceret igl cudeschet davart Spleia ad igl Hotel Bodenhaus. Blears passànts, sen vieadi anviers igl Pass digl Spleia near digl St. Bernardino, bandunan la veja prinzipala a saferman ca sualmeing a Spleia ad arivan segl «Bodenplatz», igl zenter da Spleia. Igls «pazzis», tgeas gigànticas, construidas agl

stil da biagear sidalpin, fan surstar blears. Els vignan a sadumandar: «Da noua dariva quella rehezta an quella pintga vischnànca muntagnarda?» A quellas dumondas raspundan igls auturs an moda a maniera semplia a divertainta. Passànts a passànts vignan da saver ca betga igl Pass Gottard near igl Pass digl San Bernardino, mobagn igl Pass digl Speia cara antruras la ruta da transit prinzipala svizra sur las Alps. Quella ruta à do la taimpra a la Valragn durànt tschantaners. Me pocas familgas en davantadas rehas cun agid da transport-a-comeserzi, oters vevan lur ocupaziun sco sumadurs an cumbinaziun cun l'agricultura 'par puder nutrir lur familgas. Tier igls reh sudeva la famiglia Zoja c'è scho biagear la tgea «Bodenhaus» digls 1722, par magasinar roba a par metèr a sust asens mèls a tgeavals digls sumadurs. Radund 100 ons ple tard, cura ca la muntada digls sumadurs e ida a decadenza par motivs ca veias par tgar a tgeav en vagnidas biageadas sur igls pass anviers sid, e la tgea Bodenhaus vagnida transformada an egn hotel. Alura e ear igl trafi da vieadi davanto ple impurtant, cun igl punct culminant anturn igls 1850. Dantant tutanegna, cura c'igl tunel da vieafier tras igls Gottard e vagnieu aviert digls 1882 e la vischnànca da Speia curdada an amblidanza. Blears



L'ustiera Angela Löschl-Burkhardt, ustiera digl Hotel Bodenhaus digls 2000 davent.

FOTOS G. R. CANI

da Spleia en emigras an l'America near an la Nova Zelanda.

Igl cudeschet cun blears ilustraziùns porscha agls viandànts egna anvesta an

l'istorgia da Spleia c'e blear duple c'egna staziun da passagi sen veia anviers sid near nord. La balezta cuntrada, igls numerus fastezs da «tempi passati» anvidan

da turnar a Spleia a giuder la ruasseydad solitara da quella vischnànca muntagnarda cun egn toc da l'istorgia svizra speziala.